


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-58	Al-Mujaadalah	22	3	Madaniyyah	Ke-105	3





### **Zaman Diturunkan**

Surah al-Mujaadalah diturunkan selepas Surah al-Ahzaab sekitar bulan Zul Hijjah tahun ke-5 Hijrah, pada masa itu orang-orang munafiq sibuk sekali membuat propaganda memburuk-burukkan peribadi Rasulullah dan hubungan kekeluargaan Baginda. Antaranya ialah mereka mengheboh-hebohkan soal perkahwinan Rasulullah s.a.w. dengan Zainab, bekas isteri Zaid bin Haritsah yang merupakan anak angkat Baginda. Kira-kira setahun kemudian, turun pula Surah an-Nuur yang mengandungi fitnah dan tuduhan berzina oleh orang-orang munafiqin terhadap salah seorang sahabiah Rasulullah. Orang-orang munafiq berusaha sedapat mungkin melalui propaganda-propaganda jahat seperti itu untuk memecah-belahkan dan melemahkan saf-saf Islam.

### **Zhihar**

Salah satu adat resam lama Jahiliyah ialah zhihar, ia adalah satu bentuk perceraian yang tidak ada ruang dan peluang lagi untuk seseorang suami meruju` kembali kepada isterinya. Caranya ialah si suami mengumpamakan isterinya dengan belakang ibunya, dengan tujuan dan niat mengharamkan isterinya kepada dirinya sendiri buat selama-lama. Salah satu peristiwa besar yang berlaku pada ketika itu ialah Khaulah binti Tsa`lab diceraikan oleh suaminya yang sudah tua secara zhihar. Khaulah berdoa dan mengadu halnya kepada Allah dan RasulNya, sebagai jawapan Allah telah menurunkan hukum zhihar kerananya. Orang-orang yang melakukan zhihar diingatkan supaya membayar kaffarah sebagai penebus untuk dapat kembali bersama isteri demi meneruskan kehidupan keluarganya.

### **Perkaitan Surah Al-Mujaadalah Dengan Surah Sebelum Dan Selepasnya**

Di dalam Surah al-Hadid terdapat perintah supaya berjihad dengan harta dan jiwa raga dalam menentang musuh-musuh dari luar untuk menegakkan keadilan dan keamanan. Di dalam Surah al-Mujaadalah ini pula diberikan pengenalan tentang orang-orang munafiqin yang merupakan musuh-musuh dari dalam. Mereka dikatakan **حِزْبُ الشَّيْطَانِ** dan sifat-sifat mereka disebut secara terperinci.

### **Beberapa Kata Kunci Dan Tema Utama Surah**

1. Di dalam surah ini terdapat perbandingan di antara 2 golongan manusia yang disebut sebagai parti Allah (**حِزْبُ اللَّهِ**) (Ayat: 22) dan parti syaitan (**حِزْبُ الشَّيْطَانِ**) (Ayat: 19).
2. Di dalam surah ini dinyatakan orang-orang yang memusuhi Allah dan rasul (**مُحَادُّونَ**) pasti akan hina (Ayat: 5 dan 20) dan keadaan orang-orang yang kasih kepada Allah dan rasulNya (**مُؤَادُّونَ**) pula sebaliknya. (Ayat: 22). Orang-orang yang beriman kepada Allah dan hari kemudian dengan ikhlas hati tidak akan berkasih sayang dengan musuh-musuh Allah walaupun mereka terdiri daripada keluarga yang hampir.



3. Di dalam surah ini disebutkan secara khusus tentang propaganda dan bisikan jahat sesama orang munafiq. Orang-orang munafiq walaupun dilarang, terus mengadakan pertemuan sulit dalam melakukan dosa dan menderhakai Rasul (Ayat: 7). Orang-orang Islam dilarang daripada melakukan dosa dan menderhakai Rasulullah dalam majlis-majlis yang sulit seperti dilakukan oleh orang-orang munafiq (Ayat: 8). Walau bagaimanapun orang-orang Islam dibenarkan mengadakan majlis-majlis yang sulit atau berbisik-bisik sesama mereka untuk maksud baik dalam perkara-perkara kebajikan dan ketaqwaan (بر وتقوى) (Ayat: 8). Umat Islam dima'lumkan bahawa tujuan orang-orang munafiq yang berbisik-bisik dan mengadakan majlis-majlis sulit mereka ialah untuk mendukacitakan orang-orang yang beriman. Itu adalah salah satu perancangan jahat syaitan. (Ayat: 10).